

四庫全書

子部

欽定四庫全書

子部

冊府元龜卷二百六十九

詳校官中書臣王鵬

員外郎臣牛穎文覆勘

總校官庶吉士臣何思鈞

校對官學正臣湯垣

謄錄舉人臣黎圖

欽定四庫全書

冊府元龜卷二百六十八 宋 王欽若等 撰

宗室部

來朝 輔政 就國

來朝

昏定晨省為子之道也春朝秋覲事君之義也蓋所以正班爵而有叙訓上下而為典者焉自漢氏之世戚藩列樹連城布土分王同姓慎簡僚采為之傳相雖違顏

於咫尺而存心於象魏故得歲自入謁時或召對恭上之體無越於常度展親之憂宛如於家人亦有徵詣行在駿奔祀事忠勤形於貢奉孝弟著於誠明為國邸之表儀推聞望於英哲宜乎優賜名數加進秩封遂其請求曾無所吝者矣魏晉而下奉圭覲見者咸以記云

漢高祖九年十月楚王交朝未央宮

八年九月自雒陽至長安

十年十月荆王賈楚王交齊王肥來朝

惠帝元年淮南王長入朝

長立三年也

二年十月齊悼惠王肥來朝獻城陽郡以益魯元公主邑

文帝二年三月立皇子武為代王參為太原王揖為梁

王武後徙為淮陽王又徙梁王十四年

文帝十五年

入朝十

七年十八年比年入朝留

比頻也留謂在京師

其明年乃之國

二十一年入觀參五年一朝凡三朝揖五年一朝凡再

入朝

景帝二年梁王武入朝

武立二十  
四年也

三年梁王武復入朝

武立二十  
五年也

四年衡山王勃來朝初吳楚王反王堅守無二心是年吳楚已破王朝帝以為貞信乃勞苦之勞音來曰南方卑濕徙王於濟北以褒之

七年十月梁王武入朝

武立二  
十九年

帝使使持乘輿駟馬迎

梁王於闕下

天子副車駕駟馬與即車也

既朝上疏因留中六年冬

梁王武復入朝

武立三十  
五年也

上疏欲留帝弗許

後二年諸王來朝有詔更前稱壽歌舞長沙定王發但  
張袖小舉手左右笑其拙帝怪問之對曰臣國小地狹  
不足回旋帝以武陵零陵桂陽屬焉

武帝元光六年衡山王賜入朝是時淮南王安河間王  
德入朝安德史失其年

昭帝元鳳中廣陵厲王胥入朝益封萬戶

成帝河平中楚孝王囂入朝正月時被疾帝閔之詔與  
子男一人俱從王入朝也是時東平思王宇來朝上疏求諸

子及太史公書帝以問大將軍王鳳對曰臣聞諸侯朝聘考文章正法度非禮不言今東平王幸得來朝不恩制節度以謹防危失危失謂失道而傾危也而求諸書非朝聘之

義也諸子書或反經術非聖人或明鬼神信物怪物亦鬼

太史公書有戰國縱橫權譖之謀漢興之初謀臣奇策天官災異地形阨塞皆不宜在諸侯王不可予不許之辭宜曰五經聖人所制萬事靡不畢載王審樂道傅相皆儒者朝夕講誦足以正心虞意虞與娛同夫小辯破義大

道不通致遠恐泥皆不足以留意  
泥音乃細反  
經術者不愛於王

愛惜也於王無所惜

對奏天子如鳳言遂不與

後漢光武中元元年正月東海王疆沛王輔楚王英濟

南王康淮陽王延趙王盱皆來

盱音詡又况干反

二月從封岱

山疆因留京師二年冬歸國

明帝永平二年九月沛王輔楚王英濟南王康淮陽王

延東海王政來朝

六年正月沛王輔楚王英東平王蒼淮陽王延琅邪王

京東海王政趙王盱北海王興齊王石來朝

十一年正月沛王輔楚王英濟南王康東平王蒼淮陽  
王延中山王馬琅邪王京東海王政來朝

十五年二月帝幸彭城耕於下邳三月徵琅邪王京會

良成

縣名故城在今下邳縣北

徵東平王蒼會陽都

縣名在今沂水縣南又徵

廣陵侯及其三弟會魯祠東海恭王陵

章帝建初七年正月沛王輔濟南王康東平王蒼中山

王焉東海王政琅邪王宇來朝

元和二年九月徵濟南王康中山王焉會祭烝嘗

三年正月北巡狩濟南王康中山王焉西平王羨六安

王恭樂成王黨淮陽王炳任城王尚沛王定皆從臣欽若等

按元和二年九月徵濟南王康中山王焉其餘史不書來朝年月

章和二年正月濟南王康阜陵王延中山王焉來朝

安帝延光三年二月辛大山齊王無忌東海王普樂安

王延來朝

魏文帝黃初四年任城王彰雍丘王植朝京師

明帝太和五年冬詔諸王朝京師

青龍三年徵燕王宇入朝

景初二年徵燕王宇詣京師

晉武帝泰始四年太原王瓊入朝賜袞冕之服

六年高陽王珪入朝以父母年高乞留供養拜尚書遷

右僕射

咸寧中河間王顥與諸王俱來朝帝歎顥可以為諸國

表儀

惠帝永光二年二月鎮南將軍楚王瑋鎮東將軍淮南

王允來朝

是時秦王東來  
朝史不書月

元康九年淮南王允入朝拜驃騎將軍

宋高祖永初二年長沙王道憐自京口朝正入住殿省

後魏獻文和平六年十月徵陽平王新城京兆王子推

濟陰王小新城汝陰王天賜任城王雲入朝

後周靜帝即位趙王括陳王純越王達代王盛滕王道

來朝

唐太宗貞觀十一年十一月丁亥潞州刺史韓王元嘉  
絳州刺史霍王元軌豫州刺史道王元慶並來朝

十二年齊州都督齊王祐入朝因稱疾願留京師

十六年十一月癸丑朔梁州都督漢王元昌徐州都督  
徐王元禮絳州刺史霍王元軌壽州刺史舒王元名揚  
州都督越王元貞來朝

二十年十月徐州刺史霍王元軌許州刺史蔣王惲來

朝

二十一年十月滑州刺史舒王元名相州刺史趙王貞  
來朝貢

二十二年十月絳州刺史徐王元禮襄州刺史紀王慎  
來朝

梁太祖開平四年十月乙亥東京留守博士友文入覲  
召之也

後唐愍帝應順元年閏正月癸亥洋王從璋自河中入  
覲獻甲馬二十疋

輔政

夫右賢左戚古之道也自商周之並建子弟以屏王室或入為卿士宰司國政故雖五屬之親而無官蓋尚德也是知熙帝載執國成惟賢明而是託當親羈而並進繇漢而下迄於後周或選自宗英寘於輔弼典掌衡軸猶綸政治蓋有奕葉載德濟美垂裕任職興化式是人望斯固駿瑕寅亮之業茂焉非特藩翼懷寧之謂也至或登用非允授受斯失致覆敗者亦時有之斯可監也

已

商微子啓帝乙元子為紂卿士

周公旦武王之弟自武王即位旦常輔翼武王用事居多武王九年東伐至孟津周公輔行十一年伐紂至牧野周公佐武王作牧誓破殷入商宮封周公旦於少昊之墟曲阜是為魯公公不就封留佐武王及成王即位少在襁褓之中周公恐天下畔周乃踐阼代成王攝行政當國成王長能聽政於是周公乃還政於成王就羣

臣之位

臣欽若等曰周公不就封以子伯禽之國其為

王卿士者世為周公屬王奔彘時周公與召公

立太子靜是為宣王二相輔之史

闢其名其後莊王時有周公黑肩

畢公高文王之子成王懼太子釗之不任乃命召公畢公率諸侯以相太子而立之

衛康叔封

封名冉季載周公母弟皆有馴行於是周公

舉康叔為周司寇冉季為周司空以佐成王治皆有名於天下

武公和康叔之後有文章又能聽其規諫以禮自防厲

王時入相於周詩人作淇澳以美之

祭公謀父周公之後穆王時為王卿士

凡伯周公之裔厲王時為王卿士

虢文公文王母弟虢仲之後宣王時為王卿士

鄭桓公友周厲王少子而宣王庶弟也

年表云  
母弟

幽王以

為司徒

幽王八年  
為司徒

和集周民周民皆說河雒之間人便

思之

武公掘突桓公子父子為周司徒善於其職國人宜之

故作緇衣之詩美其德以明有國善善之功焉

王子虎襄王時為太宰

漢彭侯

彭東海縣

中山靖王子武帝時自涿郡太守為

左丞相詔曰夫親親任賢周唐之道也以彭戶二十二

百封左丞相為彭侯

後漢東平王蒼光武子明帝時為驃騎將軍在朝數載  
多所隆益而自以至親輔政聲望日重意不自安上疏  
歸職帝優詔不聽疏云居宰相之位同氣  
之觀餘具宗室退讓門

魏邵陵侯真太祖族子文帝黃初三年以真為上軍大將軍都督中外諸軍事遷中軍大將軍七年與陳羣等受遺詔輔政明帝即位累遷大將軍司馬

貞子武安侯真明帝時為衛武將軍帝寢疾乃引真入卧內拜大將軍假節銳都督中外諸軍事錄尚書事與太尉司馬懿並受遺詔輔少主

晉安平王孚宣帝次弟為魏太傅武帝受禪詔曰太傅勲德弘茂朕所瞻仰以光導弘訓鎮靜宇內願奉以不

臣之禮其封為安平王邑四萬戶進拜太宰持節都督中外諸軍事有司奏諸王未之國者所置官屬權未有備帝以孚明德屬尊當宣化樹教為羣后作則遂備置官屬焉

孚子義陽王望為魏司徒武帝泰始三年詔曰夫尚賢庸勲尊崇茂親所以體國經化式是百辟也且台司之重存乎天官故周建六職政典為首司徒中領軍以明德近屬世濟其美祖考創業翼佐大命出典方任入贊

朝政文德既著武功宣暢逮朕嗣位弼道惟明宜登上司兼統軍戎內輔帝室外隆威重其進位太尉中領軍如故置太尉軍司一人參軍事六人騎司馬五人又增置官騎十人并前三十假羽葆鼓吹

汝南文成王亮宣帝子武帝末為太尉錄尚書事遺詔委以後事楊駿索詔視遂不還及駿誅詔曰大司馬汝南王亮體道沖粹通識政理宣翼之績顯於本朝二南之風流於方夏將憑遠猷以康王化其以亮為太宰

錄尚書事入朝不趨劍履上殿增掾屬十人給千兵百騎與太保衛瓘對掌朝政

亮子西陽王羨元帝太興初錄尚書事進位太宰領太尉

梁王肜宣帝子惠帝元康中為大將軍尚書令領軍將軍錄尚書事永康初共趙王倫廢賈后詔以肜為太宰守尚書令是時改司徒為丞相以肜為之倫滅詔肜以

太宰領司徒

齊王攸文帝之子武帝踐祚時朝廷草創而攸總管軍事撫寧內外莫不景附遷驃騎將軍開府辟召禮同三司每朝政大義悉心陳之累遷侍中司空

攸子武閔王冏惠帝時為平東將軍假節鎮許昌與成都河間常山新野四王誅趙王倫惠帝反正以冏為大司馬於是輔政居攸故宮

成都王穎武帝子助齊王冏誅趙王倫惠帝以穎為大將軍錄尚書事冏敗穎懸執朝政事無巨細皆就鄰諮詢

之

高密王泰宣帝弟馗之子惠帝永熙初為司空楚王瑋之被收泰嚴兵將救之祭酒丁綏諫曰公為宰相不可輕動且夜中倉卒宜遣人參審定問泰從之瑋既誅乃以泰錄尚書事遷太尉尚書令

東海孝獻王越惠帝西幸以越為太傅與太宰顥夾輔朝政讓不受懷帝即位委政於越

武陵忠敬王遵元帝孫宋高祖義旗興復朝廷稱受密

詔使遵總攝萬幾加侍中大將軍移入東宮內外畢敬  
遷轉百官稱制書又教稱令書安帝反正更拜太保  
會稽文孝王道子孝武帝子大元中錄尚書六條事尋  
領司徒安帝踐祚有司奏道子宜進位太傅揚州牧中  
書監假黃鉞備殊禮固辭不拜詔內外衆事動靜諮之  
帝既冠道子稽首歸政

宋彭城王義康高祖子文帝即位初為荊州刺史元嘉  
六年司徒王弘表義康宜還入輔政侍中都督揚南徐

充三州諸軍事司徒錄尚書事領平北將軍南徐州刺  
史持節如故二府並置佐領兵與王弘共輔朝廷弘既  
多疾且每事推謙自是內外衆務一斷之義康性好吏  
職銳意文按糾剔是非莫不精盡既專總朝權事決自  
已生殺大事以錄命斷之凡所陳奏入無不可方伯以  
下並委義康授用繇是朝野輻湊勢傾天下義康亦自  
強不息無有懈倦府門每旦常數百乘車雖復位卑人  
微皆被引接愛惜官爵未嘗以階級私人凡朝士有才

用者引入闕下樂為竭力不敢欺負

江夏王義恭高祖子文帝元嘉十六年進位司空加侍中都督揚南徐兗三州諸軍事司徒錄尚書事二十一年進太尉領司徒義恭既小心恭慎且戒義康之失雖為總錄奉行文書而已故文帝安之孝武踐阼累加太宰前廢帝即位詔曰總錄之典著自前代孝建始年雖楚并省而因革有宜理存濟務朕覽獨在躬未涉政道百揆庶務允歸尊德太宰江夏王義恭新除中書監太

尉地居崇重受遺阿衡實深馮倚冀康庶績可錄尚書事本官監太宰王如故

南郡王義宣高祖子孝武帝即位初為中書監都督豫二州丞相錄尚書六條事揚州刺史

建平王宏文帝子孝武入嗣以宏為僕射冠軍將軍中書監宏謙儉周慎禮賢接士明曉政事世祖信仗之

南齊竟陵王子良武帝子帝遺詔使子良輔政安成王知尚書事子良素仁厚不樂世務乃推安成詔云事無

大小悉與鸞參議

巴陵王寶義和帝西臺建以為侍中司空梁王定京邑  
宣德太后令以寶義為太尉領司徒詔云不言之化形  
於自遠時人皆云此寶錄也

後魏江夏公呂道武族弟位外都大官委以朝政大見尊重  
扶風公處真烈帝之後少以壯烈聞位殿中尚書委以大  
政甚見尊禮

文安公屈國之跋族明元時居門下出納詔命明元東

巡命屈行右丞相命掌軍國甚有聲譽

彭城王勰獻文子孝文時除侍中長直禁內參決軍國大政萬幾之事無不預焉

咸陽王禧孝文末為太尉與司徒彭城王勰司空北海王祥尚書左僕射廣陽王嘉等受遺輔政景明二年春詔曰朕以寡昧夙罹閼凶憂焚在疚罔知攸濟實賴先帝聖德遺澤所覃宰輔忠賢劬勞王室用能撫和上下清肅內外乃式遵復子歸政告遜辭理懇至邈然難奪便當

勵茲空乏親覽機務咸陽王尊唯元叔道性淵凝可進位太保領太尉司空北海王季父英明聲略茂舉可大將軍錄尚書事

高陽王雍宣武末為太尉孝明即位初侍中于忠以門下議以帝幼年未親機政太尉高陽王雍屬尊望重宜入居西相栢臺省決庶政

任城王澄明德茂親可為尚書令總攝百揆

清河王懌孝明即位靈太后以懌帝之懿叔德允具瞻

卷上  
委以朝政事擬周霍憚竭力輔佐以天下為已任  
汝南王悅正光中為侍中太尉孝明詔入居門下與丞  
相高陽王雍參決尚書奏事

東魏孝靜天平二年二月以太尉咸陽王坦為太傅以  
司州牧西河王悰為太尉

三年二月以開府儀同三司華山王鶴為大司馬  
四年正月以汝陽王暹為錄尚書事

興和四年四月以太尉彭城王韶為錄尚書事

武定二年三月以元弼為錄尚書事

北齊任城王湝高祖子自孝昭武成時車駕還鄴常令  
湝鎮晉陽總笄省歷司徒太尉笄省錄尚書事

彭城景思王浟高祖子皇建初拜大司馬兼尚書令轉  
太保武成入承大業遷太師錄尚書浟明練世務果於  
斷決事無大小咸悉以情

趙郡王叡河清中為司空攔錄尚書事累加尚書令拜  
太尉叡父典朝政譽望日隆

後周晉蕩公護太祖之兄邵惠公顥之少子自太祖為  
丞相立左右十二軍總屬相府太祖崩後皆受護處分凡  
所徵發非護書不行護屯兵禁衛盛於宮闈事無巨細  
皆先斷後聞孝閔踐祚大司馬封晉國公邑萬戶遷大  
冢宰高祖立百官總已於護保定元年以護為都督中  
外諸軍事令五府總於天官

就國

自漢懲亡秦之失尊王子弟魏晉代興咸進戚屬申畫

邦壞署置官號南面君民奕世傳祚所以屏翰王室為  
磐石之宗也而史氏或載其就封之始或述其還國之  
自乃有勝衣疏爵既壯而方出明德入輔辭寵以言歸  
或修覲而旋或被遣而去至於慈愛隆篤恩紀優洽亦  
并而叙之所以記封建沿襲之異宜典章因革之殊制  
者已

漢營陵侯澤立為琅邪王與齊人田生之國生勸澤急  
行母留出闕呂太后果使人追之已出即還

齊悼惠王肥高祖六年立孝惠二年入朝帝與齊王燕飲太后前置齊王上坐如家人禮以兄弟齒列不從君臣之禮故曰家人也太后怒欲鳩之齊王自以為不得脫長安內史士曰

王官士其名太后獨有帝與魯元公主今王有七十餘城而

公主乃食數城王誠以一郡上太后為公主湯沐邑太

后心喜無患矣於是齊王獻城陽郡以尊公主為王太

后為齊王太后言以母禮事之所以自媚也呂太后喜而許之迺置酒齊邸樂

飲遣王歸國

梁孝王武孝文十七年十八年比年入朝留

比頻也留謂在京

其明年乃之國孝景二十九年入朝帝廢栗太子太后心欲以梁王為嗣大臣有所關說太后議格乃辭歸國三十五年冬復入朝上疏欲留帝不許乃歸國

燕刺王旦武帝元狩六年四月與齊王閼廣陵厲王胥同日立旦壯大就國

淮陽憲王欽宣帝元康三年立宣帝甚愛之元帝即位

乃遣之國

東平思王宇宣帝甘露二年立元帝即位就國

春陵侯仁以春陵下濕求減邑內徙元帝初元四年徙封南陽之白水鄉猶以春陵為國名遂與從弟鉅鹿都尉回及宗族往家焉

仁子敬襲封為廬江都尉族兄安衆侯劉崇起兵王莽思惡劉氏徵敬至長安免歸國

後漢魯王興哀王石並建武二十七年就國東海恭王彊建武二年立為皇太子十七年而母郭后廢彊不自

安數陳懇誠願備藩國十九年封為東海王二十八年就國帝以彊廢不以過去就有禮故優以大封兼食魯郡初魯恭王好宮室起靈光殿甚壯是時猶存故詔彊都魯中元元年入朝徙封岱因留京師明年春帝崩冬乃歸國

沛王輔楚王英濟南王康淮陽王延並建武二十八年就國

中山王焉以郭太后少子諸王就國焉獨留京師三十

年徙封中山王永平二年冬諸王來會辟雍歸藩詔焉與俱就國從以虎賁官騎馬上疏辭讓顯宗報曰凡諸侯出境必備左右故夾谷之會司馬以從今五國各官騎百人稱媞前行皆北軍胡騎便兵善射弓不空張發必決眡夫有文事必有武備所以重藩職也王其無辭

東平王蒼明帝即位為驃騎將軍表乞上將軍印綬退就藩國辭甚懇切永平五年乃許還國而不聽上將軍

印綬六年帝幸魯徵蒼從還京師明年陰太后既葬乃歸國十一年與諸侯朝京師月餘還國帝臨送歸宮悽然懷思乃遣使手詔賜國中傳曰辭別之後獨坐不樂因就車歸伏軾而吟瞻望永懷實勞我心誦及采菽以增歎息蒼建初六年冬上疏求朝明年正月帝許之七年三月大鴻臚奏遣諸王歸國帝特留蒼賜以秘書列仙圖道術祕方至八月飲酎畢有司復奏遣蒼乃許之詔賜蒼曰骨肉天性誠不以遠近為親疎然數見顏色情

重昔時念王久勞思得還休欲署大鴻臚奏不忍下筆顧授小黃門中心戀戀惻然不能言於是車駕祖送流涕而訣復賜乘輿服御珍寶輿馬錢布以億萬計

琅邪王京明帝尤愛幸永平五年乃就國

西平王羨章帝遺詔徙封陳王章和二年就國

六安王恭章帝遺詔徙封彭城王章和二年就國

樂成王黨與章帝同年尤相親愛章和二年就國

下邳王衍有容貌章帝即位常在左右章和二年就國

梁王暢明帝尤愛幸章帝緣先帝之意恩寵甚篤和帝即位就國

常山王章殤帝延平元年就國

清河王慶殤帝延平元年與濟北王壽河間王開常山

王章就國慶立凡二十五年乃歸國

和帝遵肅宗故事兄弟皆留京師有

司請遣諸王歸藩不忍許之殤帝立乃就國

平乘王伉伉子寵皆薨於京師子鴻嗣順帝即位始就

國

魏任城王彰太祖之子文帝即王位彰與諸侯就國彰始以先王見任有功冀因此遂見授用而聞當隨例意甚不悅不待遣而去

陳思王植黃初元年與諸侯並就國四年來朝是時待遇諸侯法峻任城暴薨諸侯既懷友于之痛植及白馬王彪還國欲同路東歸以叙隔闊而監國使者不聽植發憤告離作詩以贈彪

晉東平王楙為侍中與東安公繇善繇欲擅朝政與汝

南王亮不平亮託以繇討楊駿顧望免繇楙等官遣楙就國又鎮下邳惠帝西幸遣使者劉虔即拜兗州刺史范陽王虓徙楙青州楙不受命虓遣將田徽擊破楙走就國

太原王輔武帝受禪初封渤海王泰始二年之國下邳王晃泰始二年與太原王瓌之國瓌子河間王顥初襲父爵咸寧二年就國

梁王彤武帝踐祚封梁王及之國遷北中郎將武帝咸寧初遣

諸王之國獨平原王幹  
有篤疾故特詔留之

樂安王鑒泰始中拜越騎校尉咸寧初以齊之梁鄧益  
封因之國服侍中之服

汝南王亮繇衛將軍侍中出為鎮南大將軍都督豫州  
諸軍事開府假節之國

楚王瑋初封始平王太康末徙封於楚出之國都督荆

州諸軍事

趙王倫武帝受禪封琅邪郡王及之國行東中郎將

齊王攸為鎮軍大將軍侍中太子太傅武帝諸子並弱  
太子不令內外屬意於攸中書監荀勗從容言于帝曰  
百僚內外皆歸心於齊王陛下試詔齊王之國必舉朝  
以為不可則臣言有徵侍中馮紈又言曰陛下遣諸侯  
之國成五等之制者宜先從親始莫若齊王帝既信勗  
言又納紈說太康三年乃下詔曰古者九命作伯或入  
毗朝政或出御方獄周之呂侯五侯九伯實得征之侍  
中司空齊王攸明德清暢忠允篤誠以母弟之親受台

輔之任佐命立勲劬勞王室宜登顯位以稱其贍其以  
為大司馬都督青州諸軍事侍中如故假節將本營千  
人親騎帳中司馬大車皆如舊增鼓吹一部官騎滿二十  
置騎司馬五人餘主者詳按舊制施行

秦獻王東為鎮西將軍西戎校尉假節與楚淮南王俱  
之國

淮南王允初封濮陽王拜越騎校尉太康十年徙封淮  
南仍之國

東海王越蕩陰之敗奔于下邳竟陵王楙不納越乃還國

後周宣帝大象元年五月以洛州襄國郡為趙國以齊州濟南郡為陳國以豐州武當安富二郡為越國以潞州上黨郡為代國以荊州新野郡為滕國邑各一萬戶令趙王招陳王純越王盛代王達滕王道並之國

冊府元龜卷二百六十八

欽定四庫全書

冊府元龜卷二百六十九 宋 王欽若等 撰

宗室部

委任 將兵

委任

春秋傳曰內姓選於親又曰親在外蓋明德之選異姓為後

故有出領方伯式遏外侮入踐樞宰允釐庶政或總戎昭以扈蹕或司留務而居守内外之寄於茲為重自非

蘊忠力以純茂聳才望而籍甚誠心篤固上所倚信風  
幹明允人用僉屬亦何以處股肱之任而裁決萬幾守  
宗稷之重而厭伏衆志者哉

漢楚元王交高祖同父少弟高祖至霸上封交為文信  
君從入蜀漢還定三秦誅項籍即帝位交與盧綰常侍  
上出入卧內傳言語諸內事隱謀

後漢東平王蒼為驃騎將軍明帝每巡狩蒼常留鎮侍

衛皇太后

吳侍中峻堅弟靜之曾孫也大帝臨薨受遺輔政領武  
衛將軍典宿衛封都鄉侯

晉秦王東武帝子帝用王佐之謀遣東都督關中楚王  
瑋淮南王允並鎮守要害以彊帝室

河間王顥代梁王彤為平西將軍鎮關中石函之制非親  
不得都督關中顥於諸王為疎特以賢舉

嗣燕王恬宗室勲望有才用孝武帝時深仗之以為都  
督兗青冀幽并揚州之晉陵徐州之南北郡軍事領鎮

北將軍青充等州刺史假節

宋臨川王義慶出為使持節都督荆雍益寧州居上流之重地廣兵強資實兵甲居朝廷之半故武帝使諸子居之義慶以宗室令美故特有此授

江夏王義恭孝武立加太尉錄尚書六條事及立太子東宮文案使先經義恭

當陽侯東後廢帝時為散騎常侍丹陽尹與蕭道成袁粲褚淵分日入直決機事

南齊新吳侯景先高帝從子也為桂陽國右常侍高帝  
鎮淮陰景先以本官領軍主自隨防衛城內委以心腹  
南豐伯赤谷高帝從祖弟也子穎胄為中書郎高帝以  
穎胄勲戚子弟除左軍將軍知殿內文武事得入便殿  
豫章王嶷居高帝喪不參朝務而言事密謀多見信納  
服闋加侍中

晉安王子懋武帝永明十一年為征北將軍雍州刺史  
給鼓吹一部豫章王以喪服未畢帝以邊州須威望許

得奏之

始平王遙光鬱林王隆昌元年除驍騎將軍南東海太  
守行南徐州事仍除南彭城太守將軍如故又除輔國  
將軍吳興太守明帝廢鬱林又除冠軍將軍南蠻校尉  
西中郎長史南郡太守一歲之內頻五除並不拜是時  
帝欲即位誅賞諸事唯遙光共謀議明帝子弟弱小晉  
安王寶義有廢疾故以遙光為揚州居中遙欣居陝西  
在外權勢并在其門遙欣好勇聚蓄武士以為形援

梁吳平侯景為人雅有風力長於辭令其在朝廷為衆所瞻仰於高祖屬雖為從弟而禮寄甚隆軍國大事皆與議決

後魏遼西公意烈坐事賜死子拔干博知古今父雖有罪道武以枝連宗親委之心腹有計略屢効忠勤

文安公泥子屈與南平公長孫嵩白馬侯崔密等并決獄訟

安定王彌明元泰常中南巡為奚斤南討聲援詔彌與

北新公安同居守樂安王範之長子良梁太武之兒子也太  
武未有子嘗曰兄弟之子猶子也親撫養之長而壯勇  
多知常參軍國大計

東陽公元丕為太尉求致仕詔不許及文成南伐元丕與廣  
陵王羽留守京師并加使持節詔元丕羽曰留守非賢莫  
可太尉年尊德重位總阿衡羽朕之懿弟溫柔明斷故  
使二人留守京邑授茲二節賞罰在手其祇允成憲以  
稱朕心丕對曰謹以死奉詔羽對曰太尉宜專節度臣

但可副貳而已帝曰老者之知少者之決汝何得辭也  
孝文為太傅錄尚書事時車駕北巡就家拜授元丕留守  
詔曰中原始構須朕營視在代之事一委太傅

城陽王鸞為涼州刺史朝京師會文帝南討領鎮將軍  
定都雒陽孝文幸鄴詔鸞留守

趙郡王幹領吏部尚書太妃韓氏薨孝文詔曰季代多  
務情緣理奪幹既居要任銓衡是荷豈容遂其私志致  
曠所司可遣黃門郎敦喻令勉從王事朕尋當與之相

見拜使持節督南豫郢東荆三州諸軍事征南大將軍  
開府豫州刺史及為司州牧孝文南討詔幹都督中外  
諸軍事給鼓吹一部甲士三百人出入殿門

廣陵王羽為太子太保錄尚書事孝文將南討遣羽持  
節安撫六鎮發其突騎夷夏寧悅還領廷尉卿車駕既  
發羽與太尉元丕留守加使持節及還都議定詔羽兼太  
尉告於宗室遷京之後北蕃人民多有未悟羽鎮撫代  
京內外肅然帝嘉之

高陽王雍為中護軍行鎮北大將軍孝文南伐以雍行  
鎮軍大將軍總攝留守事

任城王澄為吏部尚書時恒州刺史穆泰在州謀反推  
朔州刺史陽平王順為主順表其狀孝文召澄入見凝  
閒堂曰適得陽平表曰穆泰謀為不軌招誘宗室脫或  
必然遷京甫爾北人戀舊南北紛擾朕雒陽不立也此  
事非任城不辦可為我力疾向北如其弱也直往擒翦  
若其勢強可承制發并肆兵以殄之此雖知王患既是

國家大事不容辭也澄曰泰等愚惑正戀本為此非有遠圖臣誠怯弱不憚是輩雖復患懾豈敢有辭謹當罄盡心力繼之以死願陛下勿憂帝笑曰得任城此行朕復何憂也遂授節銅虎竹使符御仗左右仍行常州事後遷右僕射南齊遣其太尉陳顯達入寇漢陽是時孝文不豫引澄入見清徽堂詔曰顯達侵亂漢陽不安朕不親行莫攘此賊朕疾患淹年氣力惙敝如有非常委任城大事是役必須從朕澄涕泣對曰臣謹竭股肱之

力畢命上報遂從駕南伐

澄子嵩孝明時為平南將軍表請伐梁詔曰所陳嘉謀深是良計如當機形可進任將軍裁之既而梁武尋克建業乃止

陽平王新成長子順累遷懷朔鎮大將軍都督三道諸軍事北討詔徵赴京問戰伐之事對曰當仰仗廟筭使呼韓同渭橋之禮帝歎曰壯哉王言朕所望也

北海王詳從孝文南伐為散騎常侍帝自雒北巡詳常

與侍中彭城王勰並在輿輶陪侍左右又以詳行中領  
軍留守給鼓吹一部甲仗三百人兼督營構之務及宣  
武覽政遷侍中大將軍錄尚書事帝講武於鄴詳與右  
僕射高肇領軍於涇留守京師帝禮敬尚隆憑寄無替  
軍國大事總而裁決每所敷奏事皆協允

彭城王勰為司徒太子太傅侍中南齊將陳顯達內寇  
孝文親討之詔勰使持節都督中外諸軍事總攝六師  
帝不豫勰辭曰臣侍疾無暇六軍須有所託事不兩興

情力又竭更請一王總當軍要帝曰戎務侍疾皆憑於汝牽疴如此吾深慮不濟安六軍保社稷者舍汝而誰何容力更請人以違心寄宗社所賴唯在於汝諸葛孔明異姓受託而况汝乎行次清陽帝謂勰曰吾患轉惡汝其努力及至馬圈帝疾甚謂勰曰修短命也死生大分今吾氣力危惙當成不濟矣雖敗顯達國家安危在此一舉社稷所仗唯在汝身霍子孟以異姓受付况汝賢親可不免也乃手詔宣武曰吾百年之後其聽勰辭

蟬捨冤遂其沖挹之性也及宣武即位因以勰為宰輔  
勰頻口陳遺旨請遂素懷宣武對勰悲慟每不許之勰  
頻煩表聞辭義懇切帝難違遺勅遂其雅情猶逼以外  
任乃以勰為使持節侍中都督冀定幽瀛營安平七州  
諸軍事驃騎大將軍開府定州刺史勰仍陳讓又面申  
前意宣武固執不許乃述職又齊將陳伯之屯肥口  
勰往討之分命諸將頻戰伯之宵遁勰還京師帝臨東  
堂引見詔勰曰比鳳鳥未至蒼黎未化故仰屈尊謨綏

懷邊附而寇豎昏迷敢鬪淮楚叔父英略高明應機珍  
定凱旋今辰伏慰悲佇勰謝曰臣忝克戎帥撫安新故  
而不能宣武尊恩威懷遐邇致小豎伯之驅率蟻徒虔  
劉邊堡非唯仰慙天顏實亦俯愧朝列春秋責帥臣實  
當之賴陛下慈深捨過故使愚臣獲免罪責勰頓表辭  
大司馬領司徒及所增邑乞還中山有詔不許乃除錄  
尚書侍中司徒如故固辭不免勰雅好恬素不以勢利  
嬰心孝文重其事幹繁維不許雖有遺詔復為宣武留

連每垂情願常悽然歎息以詔旨懸懃僂俛應命後又  
錄尚書侍中司徒太師勰遂固辭詔曰蓋二儀分象君  
臣之位形焉上下既位唱和之義生焉自古統天位之  
主曷嘗不賴明師仗賢輔而後燮和陰陽彝倫民物者  
哉往而不返者先民誠有之斯所謂獨善其身而亂大  
倫山林之士耳賢人君子則不然也屈已以安民難身  
以濟物所謂以先知覺後知同塵而與天下俱潔者也  
朕猥以沖年纂臨寶歷實賴叔父拯濟之功誠宜永兼

將相以納維內外但逼奪先旨憚違沖挹俛志割心以  
遂高素自此水旱乖和陰陽失序是以屈王論道庶燮  
茲玉燭且師宰從容無廢清尚故周旦復辟而居之尚  
父期頤以終位王義兼國家理絕獨高可遺侍中敦諭  
宣武又修家人書於總曰諱言奉還告承猶執沖遜諱  
實庸閭政術多粧輔弼之寄仰屬親尊叔父德望兼重  
師訓所歸豈得近遺家國遠崇清尚也便願紓降特副  
傾注之心總不得已而應命

常山王素孫暉宣武時為侍中領右衛將軍雖無補益深被親寵凡在禁中要密之事暉別奉旨藏之於匱唯暉入乃開其餘侍中黃門莫有知者

北齊趙郡王琛初任東魏為定州刺史及斛斯椿等黨結高祖將謀內討以晉陽根本召琛留掌後事以為并肆汾大行臺僕射領六州九酋長大都督其相府政事琛悉決之

琛子叡小名須拔從文宣還晉陽時濟南以太子監國

因立大都督府與尚書省分理衆事仍開府置佐顯  
祖特崇其選乃除獻侍中攝大都督後因侍宴文宣  
從容顧謂常山王演等曰近來亦有如此長史不吾用  
此長史何如常山王對曰陛下垂心庶政優賢禮物須  
拔進居蟬珥之榮退當委要之職自昔以來實未聞如  
此銓授帝曰吾於此亦自謂得宜及世祖時為司空攝  
尚書事突厥嘗侵軼至并州帝親御戎六軍進止皆令  
取厥節度

清河王岳初仕東魏為晉州刺史西南道大都督得綏  
邊之稱時岳遇患高祖令還并治療疾瘳復令赴職及  
後爾朱兆猶據并州高祖將討之令岳留鎮京師遷驃  
騎大將軍儀同三司

岳子勸文宣之從弟也初除青州刺史拜日文宣戒之  
曰叔父前牧青州甚有遺惠故遣汝慰彼黎庶宜好用  
心無墜聲績勸流涕對曰臣以蒙幼濫叨拔擢雖竭庸  
愚懼忝先政帝曰汝既能有此言吾不慮也

後周廣川公測太祖族子太祖為魏丞相以測為右長史委以軍國又令測詳定宗室昭穆遠近附於屬籍歷位侍中開府儀同三司

廣陵郡公孝伯字胡玉測弟深之子其生與武帝同日太祖甚愛之養於第內及長又與武帝同學武帝嘗謂曰公與我猶漢高與盧綰也賜以十三環金帶自是常侍左右出入卧內朝務皆得預焉孝伯亦竭心盡力無所回避至於時政得失外間細事皆以奏聞帝信委之

當時莫比及將誅晉公護密與衛王直圖之唯孝伯及王軌宇文神舉等頗得參預大軍東討拜內史下大夫令掌留臺事軍還帝曰居守之重無忝戰功於是加授大將軍每車駕巡幸嘗執其手令居守

齊殤王憲太祖第五子晉公護執政時雅相親愛及護誅高祖召憲入免冠拜謝帝謂之曰天下者太祖之下也吾嗣守洪基常恐失墜家宰無君凌上將圖不軌吾所以誅之以安社稷汝親則同氣休戚共之事不相

涉何煩相謝乃詔憲往護第收兵符及諸簿籍等尋以  
憲為大家宰

隋河間王弘高祖初為後周丞相常置左右委以心腹  
觀德王雄高祖受禪封廣平王參預朝政貴寵冠絕一  
時與高煩虞慶則蘇威稱為四貴

漢王諒為笄州總管高祖幸溫湯而送之自山以東至  
滄海南抵黃河五十二州盡隸焉特許以便宜不拘律  
令

越王侗仁謹元德太子少子煬帝諸孫也帝每巡幸侗常留守東都

唐高祖義師初起授第四子巢王元吉太原郡守封姑臧郡公尋進封齊國公授十五郡諸軍事鎮北大將軍留鎮太原許以便宜行事

德宗貞元二年八月以睦王府長史嗣虢王則之為左金吾大將軍初帝以沈房超為金吾謂宰臣曰朕不欲獨厚外戚亦選宗室子有才行者獎拔之乃特用則之

焉

梁太祖辛酉京制加建昌宮使金紫光祿大夫檢校司徒守開封尹博士友文為特進檢校太保守開封尹依前建昌宮使充東都留守

將兵

詩曰大宗維翰蓋言宗室之藩屏王國也自成周之並建子弟犬牙相錯維持夾輔載祀彌久秦漢而下或委以戎重或命之征伐或贊興王之業功參於締構或遏

四夷之侮威宣於徼塞所以肅清邦慝震焯王靈磐維  
之業亦云茂矣至有四郊多壘金革未息爰命親賢兼  
領督帥慎擇副貳大署僚佐資其風望以一羣志茲亦  
周室懷柔之道漢家尊王之旨也

秦長安君成蟜始皇弟也始皇八年以成蟜將軍擊趙  
太子扶蘇始皇長子也始皇二十五年使扶蘇北監蒙  
恬軍於上郡

漢荆王賈高帝五年舉九江迎英布兵皆會陝下誅項

籍帝因使賈將九江兵與太尉盧綰西南擊臨江王共

尉共故子

燕王澤高祖十一年以將軍擊陳豨將王黃封為營陵侯江都易王非初為汝南王吳楚反時年十五有材氣上書自請擊吳景帝賜非將軍印擊吳吳已破徙王江都治故吳國治謂都之劉澤所居也

後漢順陽懷侯嘉光武族兄初隨更始征伐為偏將軍及攻破宛封興德侯遷大將軍擊延岑於冠軍降之更

始既都長安以嘉為漢中王扶威大將軍擊持節就國  
都於南鄭衆數十萬

下博侯張齊王石之子永平十六年與奉車都尉竇固  
等並出擊匈奴

魏任城王彰太祖子漢末代郡烏桓反彰行驍騎將軍  
討之悉平

陳侯仁太祖從弟從太祖征伐有功累遷征南將軍文  
帝時屯宛權遣將陳邵據襄陽詔仁討之仁與徐晃攻

破邵遂入襄陽使將軍高遷等徙漢南附化民於漢北  
帝遣使即拜仁大將軍又詔仁移屯臨潁遷大司馬復  
督諸軍據烏江還屯合肥

長平侯休太祖族子常從征伐文帝即位夏侯惇薨以  
休為鎮南將軍假節都督諸軍事車駕臨送帝乃下輿  
軌手而別

邵陵侯真太祖族子文帝黃初三年以真為上軍大將  
軍都督中外諸軍事假節銳與夏侯尚等征孫權擊牛

渚屯破之

吳奮威將軍瑜堅李弟靜之子以恭義校尉始領兵衆是時賓客諸將多江西人瑜虛心綏撫得其歡心建安九年領丹陽太守為衆所附至萬餘人加綏遠將軍十一年與周瑜共討麻保二屯破之後從大帝拒曹公於濡須帝欲交戰瑜說帝持重帝不從軍果無功遷奮威將軍領郡如故自漂陽徙屯牛渚

瑜弟征虜將軍皎始拜護軍校尉領衆二千餘人是時

曹公數出濡須皎每赴拒號為精銳遷都護征虜將軍代程普督夏口黃蓋及兄瑜卒又并其軍後呂蒙當襲南郡帝欲令皎與蒙為左右部大都督蒙說帝曰若至尊以征虜能宜用之呂蒙能宜用蒙昔周瑜程普為左右部督共攻江陵雖事決於瑜普自恃久將且俱是都督遂共不睦幾敗國事此目前之戒也帝寤謝蒙曰以卿為大督命皎為後繼擒闕羽定荊州皎有力焉皎弟沙羨侯兵皎既卒兵代統其衆以揚武中郎將領

江夏太守黃武五年大帝攻石陽與以地主使所部將軍  
鮮于丹帥五千人先斷淮道自帥吳碩張梁五千人為軍  
前鋒降萬城得二將大軍引還拜揚威將軍封沙羨侯卒  
子承嗣以昭武中郎將代統兵領郡卒無子以庶弟壹奉  
兵後襲業為將孫峻之誅諸葛恪也壹與全熙施績攻恪  
弟公安督融融自殺壹從鎮南遷鎮軍假節督夏口

平南將軍輔堅兄之子也以揚武校尉佐策平三郡策  
討丹陽七縣使輔西也歷陽以拒袁術并招誘餘民鳩

合遺散又從策討陵陽生得祖郎等策西襲廬江太守劉勲輔隨從身先士卒有功後遷平南將軍

建德侯韶字公禮堅族孫也為將軍屯京城後封建德侯權稱尊號為鎮北將軍韶為邊將數十年善養士卒得其死力

丹徒侯桓年二十五拜安東中郎將與陸遜共拒劉備備軍衆甚盛彌山盈谷桓投刀奮命與遜戮力備遂敗走桓斬上兜道截其徑要備踰山越險僅乃得免忿恚

歎曰吾昔初至京城桓尚小兒而今迫孤乃至此也桓以功拜建武將軍封丹徒侯奉邑自置長吏

建昌侯慮字子智黃武七年封建昌侯後二年丞相雍等奏慮性聰體達所尚日新比方近漢宜進爵稱王帝未許久之尚書僕射存上疏曰帝王之興莫不褒崇至親以光羣后故魯衛於周寵冠諸侯高帝五王封列於漢所以藩屏本朝為國鎮衛建昌侯慮稟性聰敏才兼文武於古典制宜正名號陛下謙光未肯如舊羣寮大

小咸用於邑方今姦宄恣睢金鼓未弭腹心爪牙惟親  
與賢輒與丞相雍等議咸以慮宜為鎮軍大將軍授任  
偏方以光大業乃許之於是假節開府治并州

晉陽義成王望字子初泰始中吳將施績寇江夏邊境  
騷動以望統中軍步騎二萬出屯龍陂為二方重鎮節  
度加大都督諸軍事會荊州刺史胡烈拒績破之望乃  
班師俄而吳將丁奉冠芍陂望又率諸軍以赴之未至  
而奉退拜大司馬孫皓率衆向壽春詔望統中軍二萬

騎三千據淮北皓退軍罷

汝南王亮宣帝子為侍中撫軍大將軍領後軍將軍統

冠軍步兵射聲長水等營

亮孫衛將軍祐初從惠帝還雖以征南兵八百人給之  
特置四部牙門永興初率衆依東海王越討劉喬有功  
拜揚武將軍

楚王璋武帝第五子為衛將軍領北軍中候

譙王恬四子尚之為前將軍允之為吳國內史恢之驃

騎司馬丹陽尹休之襄城太守各擁兵馬勢傾朝廷  
南齊豫章王嶷太祖第二子宋末為侍中總管內直衛  
沈攸之之難太祖入朝堂嶷出鎮東府加冠軍將軍袁  
粲舉兵之夕丹陽丞王遷告變先至東府嶷遣帳內軍  
主戴元孫二千人隨薛道淵等俱至石頭焚門之功元  
孫預焉

梁安成康王秀太祖子也高祖義師至新林諸王侯悉  
自拔赴軍高祖以秀為輔國將軍是時東昏弟晉熙

王寶嵩為冠軍將軍南徐州刺史鎮京口長史范岫行  
府州事遣使降且請兵高祖以秀為冠軍長史南東海太  
守鎮京口城建康平仍為使持節都督南徐兗州諸軍  
事南徐州刺史

臨川王宏高祖弟天監四年詔宏都督諸軍侵魏宏以  
帝之介弟所領皆器械精新軍容甚盛北人以為百數  
十年所未之有軍次碓口前軍克梁城

吳平侯景高祖從父弟為南兗州刺史天監四年王師

北伐景帥衆出淮陽進屠宿豫景丁母憂詔起攝職  
南康簡王績高祖子普通四年自南兗州刺史徵為侍  
中雲麾將軍領石頭戍軍事

豫章王綜普通六年三月為鎮北將軍南兗州刺史權  
頓彭城總督衆軍并攝徐州府事

鄱陽忠烈王恢齊明帝時為前軍主簿在京師高祖義  
兵至恢於新林奉迎以為輔國將軍三吳多亂高祖命  
出頓破崗建康平還為冠軍將軍右衛將軍

恢子範太清元年六月以前雍州刺史為征北將軍總督漢北征討諸軍事

邵陵王綸高祖子太清二年八月為安前將軍開府儀同三司都督衆軍以討侯景

臨賀王正德太清二年八月為北平將軍都督京師諸軍屯丹陽郡以備侯景

陳遂興縣侯詳字文幾少出家為桑門善書記談論清雅高祖討侯景召詳令反初服配以兵馬從定京邑

南康郡王曇朗梁末為著作佐郎高祖北濟江圍廣陵宿豫人東方光據鄉建義乃遣曇朗與杜僧明自淮入泗應赴之齊援大至曇朗與僧明築壘抗禦尋奉命班師以宿豫義軍三萬濟江高祖誅王僧辯留曇朗鎮京口知留府事

宜黃縣侯慧紀字元方高祖從孫從平侯景杜龕除貞威將軍通直散騎常侍宣帝大建十年吳明徹北討敗績以紀為持節智武將軍緣江都督兗州刺史

臨海侯方慶南康愍王子也宣帝大建二年以廣州刺史馬靖久居嶺表大得人心士馬強盛朝廷疑之至是以方慶為仁威將軍廣州刺史以兵襲靖靖誅進號宣毅將軍

後魏秦明王翰昭成帝子有豪氣年十五便請征伐昭成壯之使領騎二千及長統兵號令嚴明多有勦捷任城王澄孝文時為征北大將軍蠕蠕犯塞加澄使持節督北討諸軍事以討之蠕蠕遁走恒州刺史穆泰在

州謀反推朔州刺史陽平王頤為主頤表其狀孝文召  
澄入見凝問堂曰適得陽平表曰穆泰謀為不軌招誘  
宗室脫或必然遷京甫爾北人戀舊南北紛擾朕雄陽  
不立也此事非任城不辦可為我力疾向北如其弱也  
直往擒翦若其勢強可乘制發并肆兵以殄之雖知王  
患既是國家大事不容辭也澄曰泰等愚惑正因戀本  
為此非有遠圖臣誠怯弱不憚是輩雖復忠憲豈敢有  
辭謹當罄盡心力繼之以死願陛下勿憂孝文笑曰得

任城此行朕復何憂也遂授節銅虎竹使符御仗左右  
仍行恒州事及宣武時澄為揚州刺史表請南伐詔發  
冀定瀛相并濟六州二萬人馬一千五百匹令仲秋之  
中畢會淮南并壽陽先兵三萬委澄經略先是朝議有  
南伐之意以蕭寶夤為東揚州刺史據東城陳伯之為  
江州刺史戍陽石以澄總督二鎮授之節度至是勒兵  
進討以東關水衝大峴險要若東關縱水陽石則合肥有倒  
懸之急不圖大峴則歷陽有乘險之援淮陵陸道九山

水路並宜經略

北海王顥為車騎大將軍儀同三司時葛榮南進稍逼鄴城太武初以顥為侍中驃騎大將軍開府儀同三司相州刺史以禦榮

江陽王繼為平北將軍鎮攝舊都高車首帥樹者擁部民反叛詔繼都督北討諸軍事自淮朔已東悉稟繼節度

趙郡王幹為豫州刺史孝文南伐以幹為使持節車騎

大將軍都督關右諸軍事給銅虎符十

高陽王端為安東將軍青州刺史是時梁將寇逼徐揚除端撫軍將軍金紫光祿大夫使持節東南道大使處分軍機

彭城王勰孝文時為侍中帝南伐以勰行撫軍將軍領宗子軍宿衛左右

梁郡公元嘉泰和三年十一月進爵為假王督二將出淮陰隴西公元琛督三將出廣陵

中山王英正始三年四月為征南將軍都督揚徐二道  
諸軍事指授邊將時郢州治中督榮祖潛引梁軍以  
義陽應之三關之戍並據城降梁郢州刺史婁悅嬰城  
自守懸瓠城民白早生等殺豫州刺史司馬悅據城南  
叛梁將齊苟仁率衆守懸瓠悅子尚華陽公主主并為  
所劫詔英使持節都督南征諸軍事假征南將軍出自  
汝南宣武引英謂之曰婁悅統御失和銓衡闇於簡授  
故使郢民引寇關戍外奔義陽孤窘有倒懸之切王國

之召虎威名宿震故屈王親總元戎掃清氛穢昔衛霍以匈奴之故居無寧歲今南疆不靖王不得以屢勞為辭也英對曰臣才非韓白識闇孫吳徒以宗室之長頻荷推轂之寄規略淺短失律喪師宜彰子反之戮以謝天下陛下慈深念屢愛等鍾牛使臣得同荀伯再生明世誓追孟氏復為後期閼郢微冠何足平殄滅賊方略已在臣目中願陛下勿勞聖慮也宣武曰哉彼東南再清隨楚所望於將軍鍾離一眚豈足以損大德今王董

彼三軍朕無憂矣

北齊蘭陵武王長恭文襄子初為太尉與段韶討柏谷  
又攻定陽韶病長恭總其衆前後以戰功別封鉅鹿長  
樂樂平高陽等郡公

後周晉蕩公護高祖時為大家宰東征於齊詔曰神若  
軒皇尚云三戰聖如姬武且曰一戎弧矢之威干戈之  
用帝王大器誰能去兵太祖丕承天命造我周室日月  
所照罔不率從高氏乘釁跋扈竊有并冀世濟其惡腥

穢彰聞皇天震怒假手突厥驅略汾晉掃地無遺季孟  
勢窮伯主日蹙坐待滅亡鑒之愚智故突厥班師仍屯  
彼境更集諸部傾國重來星流電擊數道俱進期在仲  
冬同會并鄴大冢宰晉公朕之懿昆任隆伊呂平一字  
宦惟公是屬朕當親執斧鉞廟庭祇授有司宜勒衆軍  
量程赴集進止遲速委公處分於是徵二十四軍及左  
右廂散隸及秦隴巴蜀之兵諸蕃國兵二十萬人帝於  
廟庭授護斧鉞出軍至潼關

東平郡公神舉宣政元年為司武上大夫高祖北伐今  
神舉與原國公姚願等率兵俱入至雲陽班師及幽州  
人盧昌期等據范陽反詔神舉討擒之

隋衛昭王爽初高祖以為行軍元帥步騎七萬以備胡  
出平涼無虜而還

高都縣侯尚希初仕後周為司憲中大夫高祖總百揆  
尉遲迴屯兵武陟遣尚希督宗室兵三千人鎮潼關

唐永安王孝基高祖從父弟武德二年劉武周將宋金

剛來寇汾澮夏縣人呂崇茂殺縣令舉兵自稱衛王請授於武周以孝基為行軍總管討之

淮安王神通高祖從父弟隋末義師起與司竹賊何潘仁合勢下鄆縣衆踰一萬自稱闢中道行軍總管從高祖平京師武德元年為山東道安撫大使擊宇文化及於衛縣竇建德既虜化及神通後為建德所陷及建德敗復授河北道行臺尚書左僕射從太宗平劉黑闥

神通子膠東郡公道彥貞觀中為岷州都督李靖之擊

吐谷渾也詔道彥為赤水道行軍總管以討之

道彥季弟梁郡公孝逸光宅元年徐敬業據揚州作亂  
以孝逸為左玉鈴衛大將軍揚州行軍大總管督軍以  
討之

河間王孝恭高祖從父兄子武德三年為夔州總管令  
大造舟楫教習水戰以圖蕭銑尋授荆湘道行軍總管  
統水陸十二總管六年輔公祏據江東發兵寇壽陽命  
孝恭為行軍元帥以擊之

淮陽王道玄高祖從父兄子武德初從太宗擊宋金剛  
王世充竇建德以功拜雒州總管五年劉黑闥引突厥  
寇河北以道玄為山東道行軍總管以討之

江夏王道宗道玄從父弟武德初從太宗討劉武周王  
世充有功貞觀三年為大同道行軍總管與李靖破頡  
利可汗及吐谷渾寇邊以李靖為崑丘道行軍大總管  
道宗副之

隱太子建成高祖子隋末義師起拜左領軍大都督引兵

略定西河從平長安授撫軍大將軍東討元帥將兵十萬

徇雒陽臣欽若等曰武德元年以後事具儲宮將兵門

巢王元吉高祖子武德四年為稷州刺史襄州道行臺尚書令太宗征竇建德留元吉圍王世充於東都

榮王琬玄宗子天寶十四載十一月安祿山叛冊琬為元帥以河西節度高仙芝為副元帥統諸軍以東征內出錢帛於京師召募十萬衆號曰天武健兒旬日而集屯軍灞上旌旗營帳連亘二十里照耀於原野

嗣號王巨天寶中坐與史敬忠相識於南賓郡安置屬安祿山反陷東都玄宗擇將帥十五載二月張垍自襄陽還見禁中因奏巨宗室中善騎射有謀略玄宗追至京遂以為譙郡太守攝御史大夫河南節度使明日巨稱官銜奏謝玄宗驚曰何得令攝即日詔兼御史大夫巨奏曰方今艱難恐為賊所詐召臣不知何以取信玄宗劈木契分授之遂以巨兼領嶺南黔中南陽三節度使越王係肅宗子代宗乾元二年詔充天下兵馬元帥應

援軍署置所司准式

舒王謨代宗子德宗建中四年九月為揚州大都督持  
節荆襄江西沔鄂等道節度兼諸軍行營兵馬都元帥  
賜名誼改封晉王時李希烈悉衆攻襄城德宗將遣江  
西鄂岳之帥進攻蔡州慮無統帥不能齊一乃命焉以  
兵部侍郎蕭復為戶部尚書兼御史大夫元帥統軍長  
史舊令有行軍長史以復父名衡特更之又以新除潭  
州觀察使孔巢父為右庶子兼御史大夫充行軍左司馬

以山南東道節度行軍司馬檢校兵部郎中兼御史大夫樊澤為諫議大夫兼御史中丞行軍右司馬刑部員外郎劉從一為吏部郎中兼御史中丞侍御史韋纘為工部郎中兼御史中丞並充判官兵部員外郎高參為兵部郎中掌書記右金吾大將軍渾瑊為檢校工部尚書兼御史大夫為中軍虞候江西節度使嗣曹王皋為前軍兵馬使鄂岳都團練使李兼為之副山南東道節度使賈耽為中軍兵馬使荆南節度使張伯儀充後軍

兵馬使以左神武軍使王价為檢校太子賓客左衛將軍高承謙為檢校太子詹事司農少卿郭曙為檢校太子左庶子前秘書省著作郎常愿為檢校秘書少監並充押衙

輝王祚天復三年二月制為天下兵馬大元帥

嗣覃王臣欽若等  
曰史闕名景福二年制以為京西招討使神武

大將軍李鍛副之

通王史失其名  
乾寧三年二月制以為開府儀同三司判侍

衛諸軍事

梁郢王友珪開平四年十月檢校司徒充左右控鶴都指揮使兼管四蕃將軍乾化元年充諸軍都虞候

冀王友謙開平五年四月詔曰邠岐未滅關隴多虞宜擇親賢總茲戎重應以關西同雍化鄜延夏等六道兵馬并委冀王收管指揮凡有抽差先申西面都招討使仍別奏聞庶合機權以寧邊鄙

邵王友誨乾化元年以檢校兵部尚書充控鶴二指揮

使

友寧字安仁太祖從子少習詩禮長喜兵法有倜儻之風太祖鎮汴累署軍職每因出師多命驍果以從

友倫太祖仲兄存次子也帝愛其才氣錄為皇子署軍職領騎卒

後唐魏王繼岌莊宗子同光二年三月詔充諸道行營都統鄆都留守興聖宮使判六軍諸衛事伐蜀置中軍以梁漢顥充軍馬步都虞候兼中軍馬步都指揮事張

廷蘊充中軍步軍都指揮使牛景章充中軍左廂馬軍  
都指揮使沈斌充中軍右廂馬軍都指揮使卓瓌充中  
軍左廂步軍都指揮使王贊充中軍右廂步軍都指揮  
使供奉官李從襲充四面行營中軍馬步軍都監押高  
品李廷安呂知柔充衛王衙通謁工部尚書任園翰林  
學士李愚從魏王出征參預軍機

秦王從榮明宗子長興中以本官充天下兵馬大元帥

冊府元龜卷二百六十九

欽定四庫全書

子部

冊府元龜卷二百七十三

詳校官中書臣王鵬

員外郎臣牛穎文復勘

總校官庶吉士臣何思鈞

校對官學正臣湯垣

謄錄監生臣楊兆豐

欽定四庫全書

冊府元龜卷二百七十 宋

王欽若等 撰

宗室部

文學

易之小畜曰懿文德傳曰人不學不知道蓋閔子有將落之嘆宣尼著無文之論是知學問之為益文辭之為功其至矣哉乃有聯華帝裔分暉宗胄外膺維翰之寄居有敏德之美而能採考載籍服膺師訓咨求鴻碩周

旋儒雅以至貫通六藝多識前言參預述作書法示後  
掞藻彰於敏麗屬辭尚乎體要炳焉英發煥乎成章斯  
固茂公姓振振之風增時文郁郁之盛者也

周公旦武王之弟也多才多藝作七月鴻鵠之詩大誥  
微子之命歸禾嘉禾康誥酒誥梓材召誥雒誥多士無  
逸君奭多方立政及周官儀禮周頌等篇

漢楚元王交字游高祖同父少弟也言同父知其異母好書多  
材藝少時嘗與魯穆生白生申公俱受詩於浮丘伯自

魯國奄里人浮丘伯者孫卿門人也

孫卿姓荀名況為楚國蘭陵令漢以避宣

帝諱改後封楚至國以穆生白申公為中大夫高后

時浮丘伯在長安元王遣子郢客與申公俱卒業

卒終也

文帝時間申公為詩最精以為博士元王好詩諸子皆

讀詩申公始為詩傳號魯詩

凡言傳者謂為之解說若今詩毛氏傳也

元王

亦次之詩傳號曰元王詩

次謂綴集之

世或有之

梁懷王楫文帝少子好詩書帝愛之異於諸子

河間獻王德景帝子修學好古實事求是

務得事實每求真是也

其正也留

從民得善書必為好寫與之留其真

其正本也

加金帛賜

以招之繇是四方道術之人不遠千里

不以千里為遠而自至

或

有先祖舊書多奉以奏獻王者故得書多與漢朝等是

時淮南王安亦好書所招致率多浮辯獻王所得書皆

古文先秦舊書周官尚書禮記孟子老子之屬皆經傳

說記七十子之徒所論其學舉六藝立毛氏詩左氏春秋

博士修禮樂被服儒術造次必于儒者山東諸儒多從

游武帝時王來朝獻雅樂對三雍宮

辟雍明堂靈臺也

及詔策

所問三十餘事其對推道術而言得事之中文約指明  
又與毛生等共采周官及諸子言樂事者以作樂記獻  
八佾之舞與制氏不相遠其內史丞王定傳之以授常  
山王禹禹成帝時為謁者數言其儀獻王采禮樂古事  
稍稍增輯至五百餘篇

淮南王安厲王長之子也為人好書招致賓客方術之士  
數千人作為內書二十一篇外書甚衆又有中篇八卷  
言神仙黃白之術黃黃金白自銀也亦二十餘萬言武帝方好

藝文以安屬為諸父辨博善為文辭甚尊重之每為報

書及賜

賜謂時  
賜書也

嘗詔司馬相如等視草乃遣

草謂為文  
之藁草

初安入朝獻所作內篇新出上愛祕之使為離騷傳

傳謂  
毛詩傳解說之若

旦受詔日食時上又獻頌德及長安都國頌

每宴見談說得失及方技賦頌昏暮然後罷又有賦八

十二篇

陽丘侯偃齊悼惠王孫作賦十九篇

燕刺王旦武帝子博學經書雜記

廣川王去惠王越之子景帝孫也師受易論語孝經皆通好文辭

紅侯富之子辟疆字少卿楚元王之孫也好讀詩屬文  
屬文謂會綴文辭也武帝時以宗室子隨二千石議論冠諸宗室  
議論每出宗室之上也清靜少欲嘗以書自娛不肯仕有賦八篇

陽城侯德辟疆子有賦九篇

德子向字子政辟疆之孫也本名更生既冠以行修飭擢為諫議大夫是時宣帝循武帝故事招選名儒俊材

置左右更生以通達能屬文辭與王褒張子僑等並進  
對獻賦頌凡數十篇會初立穀梁春秋更生復受穀梁  
講論五經於石渠成帝時向數奏封事遷光祿大夫時  
帝元舅陽平侯王鳳為大將軍秉政倚太后專國政兄  
弟七人皆封為列侯時數有大異向以為外戚貴盛鳳  
兄弟用事之咎而帝方精於詩書觀古文詔向領校中  
五經祕書言中以別於外向見尚書洪範箕子為武王陳五行  
陰陽休咎之應向乃集合上古以來歷春秋六國至秦

漢符瑞災異之說記推迹行事連傳禍福著其占驗比  
類相從各有條目凡十一篇號曰洪範五行傳論奏之  
天子心知向忠精故為鳳兄弟起此論也然終不能奪  
王氏之權向有賦三十三篇三子皆好學長子伋以易  
教授官至郡守中子賜九卿丞早卒向少子歆字子駿  
少以通詩屬文召見成帝待詔宦者署為黃門郎河平  
中受詔與父向領校祕書講六藝傳記諸子詩賦數術  
方技無所不究哀帝初即位大司馬王莽舉歆宗室有

材行為侍中大中大夫貴幸復領五經卒父前業歆乃  
集六藝羣書種別為七畧歆及向始皆治易宣帝時詔  
向授穀梁春秋十餘年大明習及歆校祕書見古文春  
秋左氏傳歆大好之時丞相史尹咸以能治左氏與歆  
共校經傳歆畧從咸及丞相翟方進受質問大義初左  
氏傳多古字古言學者傳訓故而已及歆治左氏引傳文以  
解經轉相發明繇是章句義理備焉歆亦湛靖有謀父  
子俱好古博見彊志記過絕於人

志記也

淮陽憲王欽宣帝子也好經書法律聰達有材作賦二  
篇

後漢劉般宣帝之玄孫也王莽敗與母流轉至武威雖  
尚少而篤志修行講誦不怠其母及諸舅以為身寄絕  
域死生未必不宜苦精若此數以曉般猶不改業建武  
八年隗囂敗河西始通般即將家屬東至雒陽脩經學  
於師門

沛王輔光武子也矜嚴有法度好經書善說京氏易孝

經論語傳及圖讖作五經論時號之曰沛王通論

東平王蒼光武子少好學書為驃騎將軍是時中興三十餘年四方無虞蒼以天下化平宜脩禮樂乃與公卿共議定南北郊冠冕車服制度及光武廟堂歌八佾舞數明帝以所作光武本紀示蒼蒼因上光武受命中興頌帝甚嘉之以其文典雅特令校書郎賈逵為之訓詁及薨詔誥中傳封上蒼自建武以來章奏及所作書記賦頌七言別字歌詩並集覽焉

琅邪王京光武子好經學永平中數上詩賦頌德明帝嘉美下之史官

順陽懷侯嘉光武族兄也與伯昇俱學長安習尚書春秋

甘里侯敏光武族昆弟通經有行

臨邑侯復光武兄伯升孫也好學能文章永平中每有講學事輒令復典掌焉與班固賈逵共述漢史傅毅等皆宗事之復子駒騤及從兄平望侯毅並有才學永寧

中鄧太后召毅及駒騮入東觀與謁者僕射劉珍著中興以下名臣烈士傳駒騮又自造賦頌書論凡四篇

北海敬王睦光武兄伯升孫也少好學博通書傳光武愛之數被延納明帝之在東宮尤見幸待入侍諷誦出則執轡性好讀書嘗為愛翫能屬文作春秋旨義終始論及賦頌數十篇

平望侯毅北海敬王子也毅少有文辨安帝時上漢德論十二篇時劉珍鄧耽尹允馬融共上書稱其美安帝

嘉之

濟南王香光武曾孫也篤行好經書

陳敬王羨明帝子博涉經書有威嚴與諸儒講論於白虎殿  
劉梁宗室子孫嘗疾世多利交以邪曲相黨乃著  
破羣論時之覽者以為仲尼作春秋亂臣知懼今此論  
之作俗士豈不愧心其文不存又著辨和同之論孫禎  
亦以文才知名

魏陳思王植字子建武帝子也年十歲讀誦詩論及辭

賦數十萬言善屬文帝視其文謂植曰汝倩人邪植跪  
曰言出為論下筆成章願當面試奈何倩人時鄴銅爵  
臺新成帝悉將諸子登臺使各為賦植援筆立成可觀  
太祖甚異之明帝時植薨詔撰錄前後所著賦頌詩銘  
雜論凡百餘篇副藏內外

中山恭王袁武帝子也少好學十餘歲能屬文每讀書  
文學左右嘗恐以精力為病數諫止之然性所樂不能  
廢也每兄弟游娛袁獨譚思經典為北海王時黃龍見

鄴西漳水東上書贊頌凡所著文章二萬餘言才不及  
陳思王而好與之侔

吳孫瑜堅季弟之子好樂墳典雖在戎旅誦聲不絕孫  
承好學有文章作螢火賦行於世

晉安平獻王孚宣帝次子也博涉經史漢末喪亂與兄  
弟處危亡之中簞食瓢飲而披閱不勑

扶風王駿宣帝子也幼聰慧五六歲能書疏諷誦經籍  
見者奇之能著論與荀顥論仁孝先後文有可稱

高陽王睦宣帝弟泰之子也少好學與元帝及范陽王  
虓俱有稱於宗室

南陽王世子保字景度少有文義好述作

范陽王虓宣帝弟康王綏之子也少好學馳譽研考經  
記清辯能言論以宗室選拜散騎常侍

東安王繇宣帝子武王祐之次子也博學多才

齊獻王攸文帝子也少而岐嶷及長清和平允親賢好  
施愛經籍能屬文善尺牘為世所楷才望出武帝之右

宣帝每器之為太子太傅獻箴於太子世以為工  
高陽王睦子彪出繼宣帝弟敏少篤學不倦專精學習  
故得博覽羣籍終其綴集之務注莊子作九州春秋為  
續漢書又條譙周古史考中凡百二十二事為不當多  
據汲冢紀年之義亦行於世

宋江夏王義恭武帝子也涉獵文義孝武時每有祥瑞  
輒上賦頌撰要記五卷起前漢訖晉太元表上之詔付  
秘閣

臨川王義慶武帝弟子也撰徐州先賢傳十卷奏上之  
又擬班固典敘以述皇代之美義慶性好文義文辭雖  
不多足為宗室之表招聚文學之士近遠必至所著世  
說十一卷撰集林二百卷並行於世文帝與義慶書嘗  
加意斟酌

南平穆王驥文帝第四子也少好學有文才未弱冠擬  
古三十餘首時人以為亞迹陸機

建平宣簡王宏文帝第七子也少而閒素雋好文集宏

子景素少有父風好文章書籍

晉熙王景文帝第九子前廢帝子業立懼禍奔於魏景  
雖學不淵洽覽子史前後表啓皆其自製魏朝嘉重之  
南齊豫章王嶷高帝第二子也嶷有子十六人有文學  
者子恪子質子顯子雲子暉五人恪嘗謂所親曰文史  
之事諸弟備之矣不煩吾復牽率但退食自公無過足  
矣子恪少亦涉學頗屬文隨棄其本故不傳文集  
子範子恪之弟也為南平從事中郎王使製千字文其

辭甚美王命記室蔡遠注釋之自是府中文章皆使具草及為簡皇后哀策文詞理哀切前後文集三十卷子滂確並少有文章

子顯好學工文嘗著鴻序賦尚書令沈約見而稱曰可謂明道之高致蓋幽通之流也梁武帝雅愛子顯文又嘉其容止吐納嘗從容謂曰我造通史此書若成衆史可廢子顯對曰仲尼讚易道黜八索述職方除九丘聖製符同復在茲日時以為名對又啓撰武帝集并普通

北伐記為國子祭酒於學遍述武帝五經義子顯嘗為  
自序其畧云余為邵陵王友恭還京師遠思前比即楚  
之屈宋梁之嚴鄒追尋平生頗好辭藻雖在名無成求  
心已足若乃登高目極臨水送歸風動春月明秋夜  
早鴈初鶯開花落葉有來斯應每不能已也且前代賈  
傅崔馬邯鄲繆路之徒並以文章顯所以屢上歌頌自  
比古人天監六年始預九日朝晏稠人廣坐獨受旨云  
今雲物甚美卿將不斐然賦詩詩既成又降旨曰可謂

才子既退謂人曰一顧之恩非望而至遂方賈誼何如哉未易當也每有製作特寡思功須其自來不以力構少來所為詩賦則鴻序一作體兼衆製文備多方頗為好事所傳故虛聲易遠子顯所著後漢書一百卷齊書六十卷普通北伐記五卷貴儉傳三卷文集二十卷子顯子愷才學譽望時論以方其父簡文在東宮早引接之時中庶子謝嘏出守建安於宣猷堂饑飲並召時才賦詩同用十五劇韻愷詩先就其辭又美簡文與湘

東王令曰王筠本自舊手後進有蕭愷可稱信為才子先是太學博士顧野王奉令撰玉篇簡文嫌其書詳畧未當以愷博學於文字尤善使更與學士刪改

子雲子顯之弟也建武中封新浦縣侯自梨拜章便有文采梁天監初降爵為子及長勤學有文采弱冠撰晉書至年二十六書成百餘卷表奏之詔付祕閣為太子舍人撰東宮新記奏之梁初郊廟未革牲牷樂辭皆沈約撰至是承用子雲啓宜改之勅答曰此是主者守株宜

急改也仍使子雲撰定勅曰郊廟歌辭應典誥大語不得雜用子史文章淺言而沈約所撰亦多舛謬子雲作成勅並施用

子暉子雲之弟也少涉學亦有文才嘗預重雲殿聽制講三憲經退為講賦奏之甚見貴重

武陵王曠高帝第五子也與諸王共作短句詩學謝靈運以呈帝帝報曰見汝二十字諸兒作中最為優者但康樂放蕩作體不辨首尾安仁士衡深可崇尚顏延之

抑其次也

鄱陽王鏘高帝第七子性謙慎好文章

始興王鑑高帝第十子好學善屬文

衡陽王鈞高帝第十一子性好學善屬文琅邪王智深  
以文章相會濟陽江淹亦游焉武帝謂王儉曰衡陽王  
須文學當使華實相稱不得止取貴游子弟而已乃以  
太子舍人蕭敷為文學鈞嘗手自寫五經部為一卷置  
於巾箱中以備遺忘侍讀賀玠問曰殿下家自有墳典

復何須蠅頭細書別藏巾箱中答曰巾箱中有五經既易檢閱且一經手寫則永不忘諸王聞而爭效為巾箱五經

江夏王鋒高帝十二子也十歲能屬文武帝時藩邸嚴急諸王不得讀異書五經之外唯得看孝子圖而已鋒乃密遣人於市里街巷置圖籍暮月之間殆將備矣

穎胄高帝從弟之子也好文義弟穎基好勇武世祖登烽火樓詔羣臣賦詩穎胄詩合旨帝謂穎胄曰卿文弟

武宗室便不乏才

曲江公遙欣高帝諸孫也年十六便博覽經史  
幾字德玄遙欣之子也年十歲便能屬文作楊公則誅  
沈約見而奇之子清亦有文才

湘東王寶晊安陸昭王子也為左衛將軍明帝兄弟一  
門皆尚吏事寶晊粗好文章

竟陵王子良武帝第二子也永明五年移居雞籠山西  
邸集學士抄五經百家依皇覽例為四部要畧千卷令

司徒右長史陸惠曉參知事子良所著内外文筆數十  
卷雖無文采多是勸戒

晉安王子懋武帝第七子也謙讓好學撰春秋例苑三  
十卷奏之世祖勅付祕閣

隨郡王子隆武帝第八子也性和美有文才娶尚書令王  
儉女為妃武帝以子隆能文謂儉曰我家之東阿也出  
實為皇家藩屏

昭胄子良之子也汎涉書史有父風

賁昭胄之弟也幼好學有文才好著述嘗著西京雜記

六十卷

梁長沙宣武王懿文帝長子也懿之子藻少立名行志操清潔善屬文辭尤好古體自非公燕未嘗妄有所為縱有小文成輒棄本

駿藻從子也工文章

安成康王秀文帝第七子也精意學術搜集經記招學士平原劉孝標使撰類苑書未及畢而已行於世世子

機家多書博學強記所著詩賦千言世祖集而序之  
機弟推少清敏好屬文深為簡文所親賞

南平襄王偉文帝第八子也幼清警好學製性情幾神等論  
靜偉子也有文才而篤志好學既內足於財多聚經史  
散書滿席手自讐校

鄱陽忠烈王恢文帝第九子也年七歲通孝經論語義  
發摘無遺涉獵史籍

範恢子也溫和有器識愛奇玩古招集文才率意題章

亦時有奇致

宜豐侯修範弟也筋力貞固風儀嚴整九歲通論語十一能屬文鴻臚卿裴子野見而賞之

始興忠武王憺文帝第十一子也憺子映年十二為國子生天監十七年詔諸生答策宗室則否帝知映聰解特令問策又口對並見奇謂祭酒袁昂曰吾家千里駒也上黃侯曄映弟也美談吐簡文入居監撫曄獻儲德頌吳平侯景子勵弱不好弄聚書至三萬卷披玩不倦尤

好東觀漢記畧皆誦憶劉顯執卷策勵酬應如流乃至  
卷次行數亦不差失

長沙嗣王業武帝長兄懿之子也幼而明敏有文集行  
於世

孝儼業子也聰慧有文才射策甲科除祕書郎太子舍  
人從幸華林園於座獻相風烏華光殿景陽山等頌  
其文甚美帝深賞異之

南康簡王續武帝第四子也續子會理少聰慧好文史

通理會理之弟也博覽多識有文才嘗祭孔文舉墓並為立碑製文甚美

邵陵雋王綸武帝第六子也少聰穎博學善屬文工尺牘嘗預饑衡州刺史元慶和於座賦詩十二韻末句方同廣川國寂寞久無聲大為武帝所賞曰汝人才如此何慮無聲

確綸之次子也有文才除祕書丞武帝謂曰為汝能文所以特有此授

武陵王紀武帝第八子少勤學有文才屬詞不好輕華  
甚有骨氣

尋陽王大心簡文帝第二子也幼而聰朗善屬文

南海王大臨簡文帝第四子也少而敏慧後入國學明

經射策甲科

大連大臨之弟也少俊爽能屬文與大臨入國學明經  
射策甲科並從高祖行朱方高祖問曰汝等習騎不對  
曰臣等未奉詔不敢輒習勅各給馬試之大連兄弟據

鞍往還各得馳驟之節高祖大悅即賜所策馬及為啓  
謝文詞甚美

安陸王大春簡文帝第六子也少博涉書記

西陽王大鈞性厚重年七歲武帝問讀何書對曰學詩  
因令諷誦即誦周南音韻清雅

忠壯世子方等元帝長子也性愛林泉特好散逸嘗著  
論曰人生處世如白駒過隙耳一壺之酒足以養性一  
簾之食足以怡形生在蓬蒿死葬溝壑瓦棺石椁何以

異茲吾嘗夢為魚因化為鳥當其夢也何樂如之及其覺也何憂斯類良繇吾之不及魚鳥者遠矣故魚鳥飛浮任其理性吾之進退常在掌握舉手懼觸搖足恐墜若使吾終得與魚鳥同遊則去人世間如脫屣耳方等注范曠後漢書未就所撰三十國春秋及靜住子行於世

大園簡文帝二十子也元帝嘗自問五經要事數十條大園辭約指明應答無滯帝甚歎美之因曰昔河間好

學爾既有之臨淄好文爾亦兼之然東平為善彌高前  
載吾重之愛之爾當效焉

方諸元帝第二子也幼聰警博學明老易

後梁安成王欣幼聰警博綜墳籍善屬文後入周因與  
柳信言當明帝之世俱為一時文宗有集三十卷

陳衡陽獻王昌高帝第六子也雅性聰辯吳郡杜之偉  
授昌以經書一覽便誦明於義理剖析如流

永陽王伯智世祖第十二子也少敦厚有器局博涉經

史

新蔡王叔齊高宗第十一子也風采明瞻博涉經史善屬文

晉熙王叔文高宗第十二子也好虛譽博涉經史

淮南王叔彪高宗第十三子也少聰慧善屬文

岳陽王叔慎高宗第十六子少聰敏十歲善屬文後主尤愛文章叔慎與衡陽王伯信新蔡王叔齊等日夕陪侍每應詔賦詩嘗被嗟賞

南康愍王曇朗子方慶少清警涉獵書傳

後魏河間公齊烈帝之玄孫也齊之孫志少清辯覽書傳頗有文才

東陽公丕文帝諸孫也孝文時車駕南伐留守京師及帝還代丕請作歌詔許之歌訖帝曰公伺朕還車故親歌述志今經構既有次第故暫還舊京願後時亦同茲適

秦明王翰昭成子也翰子觚使於慕容垂垂末年政在

羣下遂止觴待之甚厚因留心學業國人咸重之

彭城王勰獻文子也從幸代都次於上黨之銅鞮山路旁有大松樹十數根時孝文進繖遂行而賦詩令人示勰曰吾作詩雖不七步亦不言遠汝可作之比至吾所可就之也時勰去帝十餘步遂且賦且行未至帝所而就詩曰間林松林松經幾冬山川何如昔風雲與古同帝大笑曰汝此詩亦調責吾耳又從孝文征河北大破梁軍帝令勰為露布勰辭曰臣聞露布者布於四海露之耳目必須揄揚

威畧頒示天下以臣小才豈足大用帝曰汝亦為才達但可為之及就類帝文有人見者咸謂御筆帝曰汝所為者人謂吾製非兄則弟誰能辯之勰對曰子夏被嗤於先聖臣又荷責於今來又敦尚文史務之暇披覽不輟撰自古帝王賢達至於魏世子孫三十卷名曰要畧清河王懌孝文子也博涉經史兼綜羣言有文才善談理為顯忠錄二十卷

京兆王愉孝文子也好文章頗著詩賦時引才人宋世

景李神雋祖瑩邢晏王遵業張始均等共申宴喜招四方儒學賓客嚴懷真等數十人館而禮之

北齊襄城景王清神武第八子也清子亮性恭孝好文章

河南康舒王孝瑜文襄長子也謙厚愛文學讀書敏速十行俱下

河間王孝琬文襄第三子琬之子正禮幼聰穎能誦左氏春秋齊亡遷綿州卒

趙郡王琛後主子也琛之子叡勵已勤學嘗夜久方罷世祖時為太尉父典朝政清貞自守譽望日隆漸被疎忌乃撰古之忠臣義士號曰要言以致其意

後周齊殤王憲太祖第五子少與高祖受詩傳咸綜機要得其指歸嘗以兵書繁廣難求指要乃自刊定為要畧五篇至是表陳高祖高祖覽而稱善

貴殤王子也少聰敏涉獵經史始讀孝經便謂人曰讀此一經足為立身之本

宋獻王政文帝子也幼而敏達年七歲誦孝經論語毛詩尚書

趙僭王招文帝子也幼聰穎博涉羣書好屬文學庾信體詞多輕豔

滕簡王遁文帝次子也少好經史解屬文所著文集頗行於世

隋高祖族弟子崇少好學涉獵書記

士達高祖族子少聰敏有學行

滕穆王瓚好書愛士甚有令名瓚子溫字明籍作事從容溫厚好學解屬文既而作零陵賦以自寄其辭哀思帝見而怒之轉徙南海

燕王倓字仁安元德太子昭之次子敏慧好讀書尤重儒素造次所及有若成人

唐江夏王道宗高祖從父兄子也晚年好學為當代所重

漢王元昌高祖第七子也少好學

韓王元嘉高祖第十一子也少好學聚書至萬卷又採碑文古迹多得異本

霍王元軌高祖第十四子也少多才藝太宗謂魏徵曰卿以元軌前代誰比徵曰經書文雅亦漢之間平也前後為刺史至州唯閉閣讀書吏事責成長史司馬

鄧王元裕高祖第十七子好學善談名理

魯王靈夔高祖第十九子有美譽好學

吳國公孝逸淮安王神通子也少好學解屬文

漢王泰太宗第四子少善屬文太宗以泰好士愛文學  
特令就府別置文學館任自引名學士貞觀十二年奏  
請撰括地志遂奏引著作郎蕭德言祕書郎顧睂記室  
叅軍蔣亞卿功曹叅軍謝偃等就府修撰成五百五十  
卷奏上太宗閱而嘉之乃下詔曰地記之設由來尚矣  
區外具於山海經內陳於夏載職方王制纔舉淮夷漢  
志晉國畧記郡國自茲以降著作實繁或學非博通多  
所遺闕或地分南北雅有短長求其折中無間盡善左

武侯大將軍雍州都督魏王泰體業貞固風鑒凝邈學  
綜策府文冠詞林樂善表於夙夜好士彰於吐握討論  
墳典詳言儒雅博採方志得之於舊聞旁求故老考之  
於傳信內殫九服外極八荒憲章之規條目有序兼苞  
戎夏之域今古無遺簡而能周博而尤要足以度越前  
載垂之不朽宜加褒錫以申獎勸可賜物一萬段其書  
且付祕閣初泰好學愛文章司馬蘇勗以自古英王多  
引賓客以著述為美遂勸泰表請修撰詔許之於是大開

館宇廣召時俊衛尉供帳光祿給食朝士學涉者多被奏追赴貴游子弟更相因致人物臻湊門庭若市泰稍悟過盛欲其速成於是分道計州繙緝統錄至是凡四年盡成撰緝之人咸加給頒賜

黃國公譏韓王元嘉子譏少以文才見知弘文閣學士孟利貞嘗稱譏文章云雖劉禕之周思茂亦不能過也諸王子中與琅邪王沖為一時之秀沖與譏父子書籍最多皆文句詳定祕閣所不及也

號王鳳玄孫則之少以宗室厯官試太常丞太僕少卿及長好學年五十餘嘗執經詣太學聽受

穎王璬玄宗第十三子讀書有文詞

永王璘玄宗第十六子聰敏好學

後唐秦王從榮為詩與從事高輦等更相唱和自謂章句獨步於一時有詩千餘首號曰紫府集既受元帥之命即令寮佐及四方遊士至者各試檄淮南書陳已將

廓清宇宙之意



冊府元龜卷二百七十